

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## **R J E Š E N J E**

**Sarajevo**

**septembar, 2020. godine**



**Broj: UP 03-26-2-018-40/19**  
**Sarajevo, 23.09.2020. godine**

Na osnovu člana 25. stav (1) tačka e), člana 42. stav (2), a u vezi sa članom 10. stav (2) tačka d), Zakona o konkurenciji („Službeni glasnik BiH“, br. 48/05, 76/07 i 80/09), postupajući po zahtjevu broj: UP-03-26-2-018-38/19 od 19.08.2020. godine privrednog subjekta „Centralno grijanje“ d.d. Tuzla, ul. Krečanska br. 1. 75 000 Tuzla, radi produženja roka za postupanje po Rješenju UP 03-26-2-018-30/19 od 28.05.2020. godine, Konkurencijsko vijeće na 73.(sedamdesettrećoj) sjednici održanoj dana 23.09.2020. godine, je donijelo

### **R J E Š E N J E**

1. Produžava se rok za postupanja po tački 2. Rješenja broj: UP 03-26-2-018-30/19 od 28.05.2020. godine privrednom subjektu Centralno grijanje d.d. Tuzla do 30.11.2020. godine, koji je dužan da u ostavljenom roku dostavi dokaz o izvršenju istog.
2. Ukoliko privredni subjekt Centralno grijanje d.d. Tuzla ne postupi u skladu sa tačkom 1. ovog Rješenja, izreći će mu se novčana kazna u skladu sa odredbama člana 48. stav (1) tačka d) i stavom (2) istog člana.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine je u postupku utvrđivanja zloupotrebe dominantnog položaja pokrenutog po službenoj dužnosti protiv privrednog subjekta Centralno grijanje d.d. Tuzla, Krečanska 1, 75 000 Tuzla, dana 28.05.2020. godine, donijelo Rješenje broj: UP 03-26-2-018-30/19, kojim je privrednom subjektu Centralno grijanje d.d. Tuzla naloženo da u roku od 60 dana od dana prijema ovog Rješenja izmijeni član 29. Opštih uslova za priključenje na sistem daljinskog grijanja i isporuku toplinske energije broj: 01-5439-2010/II-VNR-1 od 05.01.2010. godine (u daljem tekstu: Opšti uslovi) na način da se odredbe istog usklade sa Zakonom o konkurenciji, te da u ostavljenom roku dostavi dokaz o izvršenju.

Prema Obavještenju o prijemu pismena, privredni subjekt Centralno grijanje d.d. Tuzla je dana 01.06.2020. godine zaprimio predmetno Rješenje, te je rok od 60 dana o postupanju po istom istekao. Obzirom da u ostavljenom roku nisu dostavili dokaz o izvršenju Rješenja, Konkurencijsko vijeće je dana 06.08.2020. godine pod brojem UP 03-26-2-018-37/19 uputilo Zahtjev za dostavljanje dokaza o izvršenju Rješenja broj: UP 03-26-2-018-30/19.

Privredni subjekt Centralno grijanje d.d. Tuzla je dana 19.08.2020. godine dostavio Obavještenje zaprimljeno pod brojem: UP 03-26-2-018-38/19 u kom se između ostalog navodi da iz više objektivnih razloga nisu bili u mogućnosti započeti proceduru izmjena Opštih uslova. Prvenstveno ističu da je Odlukom o komunalnim djelatnostima ("Službeni glasnik Općine Tuzla" broj 9/07), u članu 4. od strane Općinskog vijeća Tuzla ovom privrednom društvu povjereno snabdijevanje

toplinskom energijom grada Tuzla pod propisanim uslovima. Ova djelatnost je uređena Odlukom o snabdijevanju grada Tuzla toplotnom energijom ("Službeni glasnik Općine Tuzla" broj 10/17), koju je također usvojilo Gradsko vijeće Grada Tuzla na dan 30.10.2017. godine. Nadalje se ističe da Gradsko (ranije Općinsko) vijeće Tuzla daje saglasnost na Opšte uslove, te da također na svaku eventualnu izmjenu Opštih uslova Gradsko vijeće Tuzla mora dati saglasnost. Obzirom da se radi o izmjeni koja ima strateški značaj za poslovanje i ekonomsku održivost ovog privrednog društva u obavljanju djelatnosti distribucije toplotne energije, predmetna izmjena u skladu sa Statutom Centralno grijanje d.d. Tuzla, obavezno treba biti usvojena na Skupštini društva kao akt kojeg bi Nadzorni odbor ovog društva prosljedio u proceduru Gradskog vijeća za dobivanje neophodne saglasnosti. Uvažavajući činjenicu da je zbog poznatog problema pandemije COVID-19, kao i sezone godišnjih odmora, reducirana mogućnost zakazivanja sjednica svih navedenih kolektivnih organa, nije ni bilo realne mogućnosti da se provede procedura izmjene Opštih uslova u naloženom dijelu. Privredni subjekt Centralno grijanje d.d. Tuzla ističe da su gore navedeni razlozi opštepoznati i objektivni i na iste se nije moglo uticati, pa nije ni bilo moguće da se pristupi predmetnim izmjenama, jer bi se time kršile Odluke Gradskog vijeća Tuzla, koje imaju obavezujuću pravnu snagu. U podnesku se nadalje navodi da smatraju da će Konkurencijsko vijeće imati razumijevanja za navedene okolnosti, jer se ne radi o hitnim pitanjima, i da će ostaviti dodatno vrijeme za realizaciju naloženog.

Konkurencijsko vijeće je nakon razmatranja iznesenih navoda, iste uzeo kao objektivne i opravdane te je imajući u vidu da pandemija virusa COVID-19 i dalje traje, ostavio rok za postupanje po Rješenju UP 03-26-2-018-30/19 od 28.05.2020. godine do 30.11.2020.godine.

U skladu sa članom 48. stav (1) tačka d) Zakona o konkurenciji, težom povredom zakona se smatra ukoliko se ne postupa po odluci Konkurencijskog vijeća iz člana 42. Zakona, te se za težu povredu može izreći novčana kazna u iznosu najviše do 10% vrijednosti ukupnog godišnjeg prihoda privrednog subjekta, iz godine koja je prethodila godini u kojoj je nastupila povreda. Također, Konkurencijsko vijeće može izreći odgovornom licu privrednog subjekta iz stava (1) ovog člana novčanu kaznu u iznosu od 15.000 KM do 50.000 KM.

*U skladu sa navedenim, odlučeno je kao u tački 1. i 2. dispozitiva ovog Rješenja.*

### **Pouka o pravnom lijeku**

Protiv ovog Rješenja nije dozvoljena žalba. Nezasadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Rješenja.

**Predsjednik**

**dr. Stjepo Pranjić**